

Cartafueyu de Moceda d'Izquierda Asturiana.  
Especial reivindicación llingüística.

N.º 9. Mayu 2006.

# na cai

# 09

**La base de los nuevos derechos llingüísticos:**

## **¡OFICIALIDÁ!**

Cada añu faise más difícil volver sobre los mesmos argumentos pa **desixir a les clares la necesidá d'oficialidá de la llingua asturiana**. La moceda d'izquierda alternativa que representa mias>> lleva mui bien de tiempu **farto de la pasividá y la incompetencia del gobiernu asturianu** lo mesmo que n'otres, tamién nesta materia, pa nós, fundamental.



Nesti sen, **mias>> nun ruega, desixe que se ponga fin a la marxiniación** de que tamos careciendo toles persones qu'emplegamos l'asturianu y el gallego-asturiano pa comunicanos en toles estayes de la vida.

Ye necesario **esbarrumbar los complexos** que caractericen a los que güei xestionen o marafundien el poder n'Asturies, faciéndu-yos ver que de la so forma irresponsable de gobernar surden, d'un llau, **l'ausencia total de derechos llingüísticos** nesti país, y d'otru, **la muerte anunciada d'una llingua** entá viva pero arrequxada qu'entierra a los sos falantes vieyos ensin da-yos un recambiu xeneracional.

Nun podemos dexar de denunciar **l'incumplimientu sistemáticu de les promeses** d'un gobiernu que pesie a autoetiquetase como "izquierda plural" amuesa maneres bien próximes al despotismu, yá seya por **incapacidá política**, amnesia, o, a cencielles, por nun

tener la más mínima intención de **tornar un procesu de desaniciu cultural de magnitú incalculable**.

Tentar de facenos creer a estes altures que la garantía de los nuevos derechos llingüísticos nun pasa indiscutiblemente y como primer pasu pela oficialidá del idioma, resulta paradigmático de la **escasa talla moral** de quien tien responsabilidad política nello.

El debate qu'entama abrise alredu de **la reforma del nuesu Estatutu d'Autonomía nun puede zarrar en falso** dexando pa prau la oficialidá, y ye que'l fechu de consiguirlo ye lo mínimo desixible a los y les autores d'una **lexistura** que de rematar con tan tristu resultáu va ser **recordada como la del maquillaxe**, na que la falta de voluntá de cambiü quixo tapecese con promeses, semeyes y munches capes de barniz.

Poru, mias>> va celebrar la **Selmana de les Lletres Asturianas** cola nuesa bandera, que ye la d'Asturies, namás a media asta, **reconociendo a les persones que vienen dignificando la nuesa lliteratura** y al empar glayando al altu la lleva que **nun vamos iguar cola supuesta política llingüística del bote de fumu**.

Esta moceda asturianista y comprometida cola tresformación va **siguir demandando'l respetu que los y les falantes ameriten** y nun va dexar la llucha nesti campu enxamás, señalando anguaño como **únicu oxetivu** la reconocencia llegal máxima, esto ye, la **oficialidá**, la ferramienta verdaderamente capaz a abrir el camín que nos lleve a la caltenencia del asturianu y del gallego-asturiano, y a protexer con más capacidá d'aición los derechos llingüísticos de toles persones qu'habiten esti país agora y nel futuru.



## ecoloxía >>

### Otru modelu enerxéticu

mias>> quier recordar que'l 26 d'abril cumpliéronse los 20 años del desastre nuclear de Chernobil, y poro, reafirmamos el nuesu compromisu na reivindicación de les **enerxíes renovables** como les úniques daveres **sostenibles**.

Mocedá d'Izquierda Asturiana amuésase satisfecha pol pieslle de la central nuclear de Zorita, considerándolu un pasu decisivu nel procesu d'**enterrar dafechu l'anacronismu de la enerxía nuclear** y d'apostar poles enerxíes renovables. Desiximos nesa llinia una **moratoria a la enerxía atómico**, un meyor desendolcu gubernamental de les enerxíes renovables y de les polítiques d'aforru nel gastu y la producción.



De la mesma forma reclamamos la **sustitución gradual y progresiva** de les fontes de xeneración d'enerxía nuclear por otres d'enerxía renovable. Pa Mocedá d'Izquierda Asturiana (mias>>), el pieslle del parque nuclear del estáu español ye una midida imprescindible nel cambiu del modelu enerxéticu, diendo hacia **otru modelu basáu na eficiencia, na seguridá y na renovabilidad**.

## emplegu >>

### Tuviemos nel Primeru

Mocedá d'Izquierda Asturiana participó'l Primeru de Mayu na manifestación **convocada por CSI, CGT y SUATEA** que tuvo llugar en Xixón. La marcha, que según la prensa, cuntó cola presencia de dellos cientos de persones entamó na Plaza

l'Humedal a les 13.00 hores pa finir n'El Náutico. El cortexu d'IAS-mias>> diba encabezáu por una pancarta onde podía lleese "**Cola 'izquierda plural' emigramos igual**".



Tampoco nun faltaron los glayíos de la mocedá: "**Asturies sálvase lluchando**". Durante la manifestación amás de cientos de pasquinos informativos, mias>> esparrió chapes y pegatines, asina como alreor de 500 copies del anterior "**na cai>>**".

### Siguimos denunciando la precariedá

Dende Mocedá d'Izquierda Asturiana (mias>>) **denunciamos la inesistencia de polítiques actives destinaes al emplegu xuvenil** n'Asturies. Los mozos y les moces de la nuesa formación nacionalista consideramos que'l **gobiernu constituyíu por PSOE y IU-BA ta siendo difícilmente empeorable** pa la mocedá asturiana, dexando la emigración como única salida pa la mocedá.

**Valoramos mui negativamente'l** balance del gobiernu de Vicente Álvarez **Areces** en materia d'emplegu mozo dao que "col gobiernu de la supuesta izquierda plural, la mocedá nun ta teniendo mayores alternativas que colos anteriores" según apunta'l nuesu portavoz, Carlos Suari.



"Un tiempu perdió pal emplegu" ye'l resume que fai Mocedá d'Izquierda Asturiana de la política d'esti gobiernu de coalición, apaeciendo la **precariedá llaboral** como una constante en tolos estudios que sobre'l tema se tán faciendo. "L'emplegu femenino y l'emplegu mozo son lo más perxudicao pola **política d'Areces, fecha d'espalda a les problemátiques sociales reales** de l'Asturies d'anguaño", comentó Suari.

Amás, mias>> vuelve **denunciar l'altísimu índiz d'esplotación llaboral** de los pocos mozos y menos moces que fueron a topar trabayu dientro del nuesu país.

Paeznos **inalmisible** que por ser muyer o moza/u tengan una remuneración salarial inferior o que la poca ufierta llaboral n'Asturies quede resumío n'**emplegos temporales** ensin opción a una vida llaboral digno.



Finalmente mias>> afirma que la mocedá asturiano "ha ser consciente de la importancia d'esti asuntu y **defender el nuesu derechu** al trabayu perriba de la inutilidá y la falta de preocupación pol futuru d'esti país del gobiernu actual, dexando bien claro que **nun tamos dispuestos/os a siguir pagando les murnies consecuencies del so matrimoniu de conveniencia**".

## movilidad >>

### De 7 a 9 hores ensin tresporte públicu

mias>> desixe la **implantación de llinies de tresporte** que comuniquen, a lo menos, los principales centros de población del país, **tamién pela nueche**. **Mesmo RENFE qu'ALSA suspenden los sos servicios n'ocasiones per más d'ocho hores**. Ye por exemplu'l casu de la

comunicación ente Uviéu y Avilés, que queda interrumpida más de siete hores nos dos sentíos durante la selmana y hasta nueve en fines de selmana y díes festivos.



**y de nueche, ¿qué?**

**mias>> solicita a RENFE, ALSA y a les alministraciones locales y asturianas qu'igüen esta torga que reduz claramente la movilidad ente ciudaes yá seya cuando'l trabayu lo precisa o cuando nos momentos d'ociu, la mocedá quier desplazase.**

Errores de plantegamientu como esti siguen demostrando qu'**entá hai mui bien de materies pendientes nel ámbitu de les comunicaciones n'Asturies**, asuntu nel que'l gobiernu asturianu había tar actuando yá.

Una posible solución ye la inclusión nos horarios de los principales medios de comunicación del país d'un par de **conexones nocturnes** a lo llargo la nueche en dambos sentíos.

**mocedá >>**

### **Tresversalidad pa la política de mocedá**

Mocedá d'Izquierda Asturiana en Xixón **reclama que la Conceyalía de Mocedá seya una conceyalía tresversal** qu'englobe competencias d'otros árees como emplegu, vivienda, cultura y educación y dexa de centrarse sólo n'ociu.

El PSOE tien un **conceptu simplista de la mocedá de Xixón** y el propiu conceyal Iván Álvarez Raja ye incapaz a tener claro lo que tien y nun tien que promover dende la so área. **"La política de mocedá que lleva a cau esti gobiernu municipal céntrase únicamentu nel ociu**, mentantu, los mozos y les moces de Xixón tienen munchos **problemes qu'hai qu'enfocar globalmente** y dende distintes árees, ye dicir, con tresversalidad" indicó **Carlos**

**Fernández Fuente, responsable de Polítiques de Desendolcu de mias>>.**

Poru, reclamamos que la **Conceyalía de Mocedá** tea implicada en competencias d'otros departamentos como educación, vivienda o emplegu, pa d'esta manera poder **ufiertar soluciones dende y pa la mocedá.**



Aprovechamos pa denunciar, a parte del conceptu reduccionista que tien l'alcaldesa de la mocedá, el despropósito qu'en sí mesma ye esta conceyalía con unos **gastos fuera de madre y ensin resultáu nengún**, un descontrol de los recursos xuveniles de la ciudá y una xestión nefasta.

### **Avance del 25 mayu, Día d'Asturies**

En bien poco tiempu taremos celebrando'l **25 de mayu, el Día d'Asturies que dende mias>> reivindicamos**. Nesti momentu tamos trabayando na fechura de dalgunos actos que van permitirnos **compartir contigo la nuesa idea sobre una Asturies soberana** del so futuru, que güei como hai 198 años seya a decidir por sí mesma.



Pa ello, tamos **colaborando con Izquierda Asturiana (IAS)** y al empar tamos desendolcando dalguna idea que lleve a la mocedá d'anguaño'l nuesu

apueste por **treslladar a esta jornada tola gayola propia del día de la nuesa nación**, el día más afechiscu pa **llevar les nueses esmoliciones a la cai**, esparciendo'l mensaxe d'una mocedá alternativa que cree n'Asturies y trabaya por ello.

### **Entama'l Soyáu Alternativu de mias>>**

Esta **nueva iniciativa** de Mocedá d'Izquierda Asturiana naz col oxetivu fundamental de **xenerar una llinia de discursu políticu** clara y que seya a llegar a les moces y los mozos d'Asturies, convidando a que participen activamente nel nuesu proyectu.

El **Soyáu** entama con un **primer testu** que va recoyer la reflexón interna de mias>> alrodiu la **independencia** y l'autodetermín. Con él, pretendemos asoleyar una **desplacación nueva** d'estos conceptos añediendo-y al componente identitariu'l que realmente val na xera de facer política, l'utilitariu.



Afondando nesta reflexón, la xente mozo que formamos mias>> **queremos da-y protagonismu a esta idea polo que tien de ferramienta nel trabayu de tresformación social** y política pola que naguamos, como preséu na llucha por algamar una **Asturies más socialmente xusta, ecolóxica y responsable cola so cultura**. Una Asturies que se presente al mundu con espíritu solidariu y abiertu ensin escaecer lo que ye y les sos necesidaes.

## Más material nuevo de mias>>

Gracies al crecimientu de la militancia de mias>> y al bon funcionamientu del material anterior, Mocedá d'Izquierda Asturiana saca agora a la venta muncho **material nuevo que vas poder consiguir poniéndote en contactu con nós.**



D'un llau, **ampliamos la nuesa colección de chapes.** Vamos a pola tercer edición de la del logotipu, la segunda de la de la escuela y de la de la igualdá y a pola primera de la nueva chapa "Cola izquierda plural emigramos igual". **Tamién tamos a piques d'asoleyar banderes de mias>> y camisetes** col lema "Asturies tien salida. Independencia".



Nos próximos actos que nos veas, **entrúganos por esti material nuevo** o si non failo nes canales habituales de comunicación: corréu postal o lletrónicu.



## Un añu "na cai>>"

Con esti novenu númberu de mayu de 2006 **tamos cumpliendo un añu de "na cai>>"**, el cartafueyu informativu de Mocedá d'Izquierda Asturiana qu'apaecía per estes feches nel 2005 cola vocación de **llevar les ideas, propuestes y actividaes de mias>> a tola mocedá asturiano.**

Nestos meses d'actividá editorial, Mocedá d'Izquierda Asturiana recoyó nes llinies del "na cai>>" una parte de la so actividá, reflexando con ello los **importantes avances que vien dando la nuesa agrupación.** Ello, nun mos fai perder la humildá cola que trabajamos siempre nin les ganas de que **xente como tu pase yá a formar parte del nuesu proyectu** políticu pa la mocedá d'Asturies.



La participación de moces y mozos con espíritu inconformista y **críticu**, d'ideariu **alternativu, ecoloxista** y **asturianista**, ye básica pa que podamos **plantar cara a les múltiples agresiones que tán sufriendo anguaño Asturies y el mundu**, los derechos fundamentales, la llibertá y la capacidá de decidir.

"na cai>>" va seguir siendo'l mediu físicu de comunicación principal de Mocedá d'Izquierda Asturiana, procuraremos dir meyorando la calidá de la publicación y aumentando les tiraes. **Durante estos primeros nueve númberos llevamos repartíos 18.000 copias** que pudisti alcontrar en cafeteríes, chigres, centros de cultura, institutos, facultaes, o que nós mesmos/os t'entregamos en mano nos actos en que coincidimos. Ye importante nun escaecer que toles ediciones de "na cai>>" ta tamién na **nuesa web** [www.ias.as/mias](http://www.ias.as/mias), pal so llibre espardimientu.

## qué ye mias? >>

Somos un grupu de **xente mozo** que facemos por esparder una **conciencia crítica** colo que nos arrodia dende una **perspectiva asturiana y d'izquierda.** La **Ecoloxía**, la **Xusticia Social** y l'**Asturianismu** son les exes de la nuestra actividá. Actividá que tien de ser fecha por y pa la mocedá asturiano, amosando que n'Asturies somos munches/os les/os que nun tamos d'alcuertu col modelu actual, que **nun vemos con bonos güeyos "l'autonomía" ruina y emprestada que nos "regala" l'estáu español**, que **nun asumimos como igua al nuestro futuru la emigración obligada, nin la explotación de los trabayos basura.** Que **nun llamamos frente a la discriminación sexista** que les moces tamos careciendo, **nin a la implantación cuasi colonial de multinacionales, nin al esfarrape del nuestro mediu ambiente...**

Trabayamos pa da-y al nuestro país otra traza. **Queremos una Asturies respetuosa col mediu, ensin xéneros, que s'enfrente a la globalización del beneficiu pa cuatro, pa mundializar los drechos sociales y llaborales.** Una Asturies arguyosa de la so identidá, de la so cultura y llingua, una Asturies **soberana**, dueña del so futuru y qu'apueste pola **democracia participativa** con una ciudadanía protagonista de les decisiones que-y afecten. Una Asturies **llibre, onde la opción sexual nun seya torga pal desenvolvimientu social.** Queremos ser la mocedá que faiga por otra Asturies, la de la xusticia y la llibertá. Ente toes y toos vamos construyir la nuesa Asturies.



**Mocedá d'Izquierda Asturiana**

[www.ias.as/mias](http://www.ias.as/mias) >> [mias@ias.as](mailto:mias@ias.as)  
Primo de Rivera, 1, of. 9. 330001 Uviéu.